


دكتور حصر
الستات عايزة تاي؟



صحت عايزه همد يعنى على جسمي او كرامتي

عايزه المساواة

عايزه ما يه تضييقه

عايزه كرامتي

عايزه حرية

عايزه مساواة

عايزه انظما

أنا عايزة أكبر وأتعليم قتل ما أتحوز عايزة
عايزة العلاج والدوا

صحة عايزه جودتي يفصيني عن الصحة

معاه غصبة صحت عايزة أشرح نفسي في البرلمان

عايزة استغل

صحة عايزه حد احسن
من عايزة حد يتحرش بي

دستور مصر

الستات عايزة إيه؟

النساء مواطنات مصريات وبيشكلوا نص عدد سكان مصر..وزي كل إنسان
عايش في البلد دي ..لهم أحلامهم في الحرية والكرامة الإنسانية والعدالة
الإجتماعية..وهي المطالب اللي رفعها الشعب ستات ورجاله في الثورة المصرية.
ولأن الستات اتظلمت كتير فعندنا مطالب تانية تخصنا كنساء..علشان مطالب
الثورة في الكرامة الإنسانية تتحقق بجد في الشغل والشارع والمواصلات وفي
بيوتنا كمان.

عايزين دستور يمنع ويجرم التمييز ضد البنات والستات في الشغل والدراسة وفي
التعيين في المناصب الحكومية الهامة وفي القضاء وفي الأحزاب السياسية وفي
البرلمان وكمان في بيوتنا.

ده حتى الدستور اللي شغالين عليه كل كلامه للرجالة..ليه ما يقولش الستات
والرجالة..ولا المواطنين والمواطنات.. ده حتى القرآن بيقول:"المؤمنين
والمؤمنات..الصالحين والصالحات." وكده يعني..همه بيقولوا لازم من
الشريعة..بس لما يكتبوا الدستور يكتبوه للرجاله.. كده يبقى بيختاروا من
الشريعة اللي يعجبهم ويسيبوا اللي مش عاجبهم.

عايزين دستور يتعامل مع العنف ضد الستات علي انه جريمة والقانون يعاقب عليها..ويحمي البنات والستات اللي بيقع عليهم العنف. لأن مش من حق أي إنسان في الدنيا أنه يضرب أو يهين أو يأذي إنسان تانى..سواء الأذي ده كان علي الجسم زى الضرب أو علي النفس زى الإهانة والسب والتحقير أو عنف جنسي زى التحرش وهتك العرض والاعتصاب ومهم كمان يكون في طريقة تحقق الأمان للبنات والستات.

ما هو العنف بقي كثير قوى لدرجة مخيفة..وبيحصل لنا واحنا ماشيين في الشارع ولا راكبين المواصلات العامة وفي المتاجر والأسواق وكمان جوه بيوتنا وده مؤذي لصحة ونفسية الستات ولازم ينتهى..والدستور لازم يقول ده بصراحة ووضوح ويعاقب عليه حتى لو حصل جوه بيوتنا.

عايزين الدولة تمنع بجد كل العادات اللي بتضر بصحة البنات..زى الختان وتزويج القاصرات..وزواج المتعة والمسيار..لأن ده مش بس جريمة عنف ضد البنات لأ ده كمان تجارة بالبني آدمين.

والأطفال اللي زى ولادنا اللي الزمن جار عليهم واشتغلوا وهمه لسة صغيرين ولا اللي مالفوش حد يحن عليهم فعاشوا في الشوارع..الكلام ده ما عدش ينفع ولا نقدر نسكت عليه بعد الثورة..الدستور لازم يحمي الأطفال دول ويعلمهم ويسكنهم ويضمن لهم حياة إنسانية..يعنى من الآخر ما يبقاش الحكومة والزمن عليهم.

وعايزين يكون في نوادي.. الولاد والبنات يعلبوا فيها ويتعلوا الرياضة والفن والموسيقي ويكون فيها مكتبة علشان ولادنا يقرأوا ويتنوروا.

مش عايزين الفقر ولأ المرض يحولنا لعييد. يعنى الدولة لازم تضمن لينا ولولادنا خدمة طبية وعلاج مجاني.. لكل الستات حتى اللي مش بتشتغل بره البيت.. ولا اللي بتشتغل باليومية أو في الزراعة.

ولازم علي الدولة تضمن معاش للستات اللي مالهاش دخل ومسئولة عن أسرة.. ما يكونش 100 جنيه زى ماهو حاصل دلوقت.. نقصد معاش يضمن عيشة كريمة لست ولعيالها ويكون قريب من الحد الأدنى للأجر اللي بتحدده المحكمة.

نفسنا بناتنا وأولادنا يتعلموا تعليم مجاني وحقيق بجد.. زى التعليم اللي في الدول المحترمة اللي يبني لبلدنا مستقبل يخلي مصر من الدول المتقدمة.. ومش عايزين البنات تسبب التعليم بسبب المصاريف ولا تكلفة الدروس الخصوصية.. ولا لإن فرص الشغل قليلة.. ولا زى ما بيتقال المهم الولد لأن البنت مسيرها للجواز.. الكلام ده عيب يستمر.. البنت لازم يكون لها نفس الحقوق زى الولد بالتمام والكمال.

يعنى علشان يبقي في مساواة.. نبقى محتاجين الستات تتوظف وتكون الدولة مسئولة عن تديهم وتطوير مهاراتهم بشكل مستمر. واللي من الستات عايش في الريف ولا بتشتغل في الزراعة لازم يكون عندها ميه للري.. وتعليم خاص بتحسين

الأرض والمحصول..وحماية للمواشي من الأمراض اللي بتموت الحيوانات اللي هي
راسمال الأسرة

مهم خالص لكل الناس ..إن كل أسرة يكون لها سكن صحي ..تدخله الشمس
وفيه ميه نقية وصرف صحي وكهريا ...ما ينفعش ملايين الأسر تعيش في العشش
والمقابر والعشوائيات بعد كده..أمال إحنا عملنا الثورة ليه؟

عايزين شرطة تخدم الشعب ..مش تكون سيف علي رقبتة ..مش عايزين
الشرطة تدخل بيوتنا بدون استئذان وتهينا ولا تهين ولادنا أو أزواجنا..واللي
يعمل كده لازم يتعاقب هوو واللي اداه الأمر..ولازم كمان يبعدوه عن العمل مع
الجمهور..لازم الدستور يقول بصراحة إن التعذيب أو إهانة الناس جريمة
وكمان مخلة بالشرف.

عايزين القانون يتطبق علي كل الشعب من الغفير للوزير..مش واحد ينضرب لما
يموت علشان غرامة بعشرين جنيه وواحد يهرب بعشرين مليار جنيه.

وكمان لازم يكون في عدالة في توزيع الدخل..مش واحد يقبض 100 جنيه في
الشهر وواحد يقبض 100 ألف جنيه في الشهر.

والضرايب هي كمان ليها حكاية..الغنى بيتعامل زى الفقير..والعدل إن اللي دخله
في السنة يساوى الحد الأدنى اللي تحدده المحكمة يكون معفي من
الضرايب..وبعد كده الضرايب تزيد مع زيادة الدخل.

عايزين نجيب نواب الشعب ورئيس الجمهورية بإرادتنا..لا بالتزوير ولا بالرشوة ولا بسبب نقص المعلومات..ومهم الإعلام يكون صادق ويدي كل مرشح فرصته علشان يشرح لنا ناوى يعمل إيه وحيعمله إزاي وفي زمن أد إيه..علشان نكون علي نور ونعرف نحاسب اللي بيخلي بينا. ومهم يكون نص مجلس الشعب ولا مجلس الشورى من الستات..ومفروض كمان الجمعية اللي بتعمل الدستور يكون نصها ستات.

عايزين نقول رأينا من غير ما نتعرض لمشكلة..نكتب في الجرايد ولا النت..نرسم..نتكلم في التلفزيون..نعمل اعتصام ولا إضراب ولا مظاهرة..نجتمع مع ناس تانية ونعمل جمعية أهلية ولا نقابة ولا رابطة..مش هي دي الحرية؟

الدستور ده العقد اللي بينا وبين الدولة..ولما بنكتب عقد بيت ولا حته أرض بندقق ونسأل المحامين ونعمل ضمانات..يبقي من باب أولي ندقق في الدستور ونراجع ونسأل ونرفض اللي مش موافقين عليه..لأن العقد المهم ده هو اللي بيضمن لنا حقوقنا..يعنى لازم الدستور يتكلم علي حقوق كل الناس وكمان يكون فيه جزء بيتكلم عن حقوق الستات والأطفال ويحط الضمانة اللي تضمن إننا نعرف نتمتع بالحق ده ..مش شوية كلام وحب علي ورق وخلص.

الست زى الراجل..والدستور لازم يضمن وصول الحق لكل الناس..الراجل والست..المسلم وغير المسلم..الأبيض والأسمر..الفقير والغنى..الصعيدي والنوبي والسيناوى ووالبحراوي والقاهري

كلنا مصريين ..كلنا زى بعض

عيش .. حرية .. كرامة إنسانية ..عدالة اجتماعية ..مساواة حقيقة